

**■ COLUMNA**

# I regna pasch

La Rumantschia tschertga ina presidenta u in president

DAVID TRUTTMANN/FMR

**L**a Lia Rumantscha ha chattà dacurt in nov secretari general. *Diego Deplazes* vegn ad entrar en uffizi questa stad. Ed en var sis mais èsi finì per *Johannes Flury* sco president da la Lia Rumantscha. Ils 30 d'october elegian delegadas e delegads numnadamain ses successur – u sia successura. Il nov president u la nova presidenta da la Lia Rumantscha vegn striunà or dal chapè.

**D**a favurisar è probabel ina dunna. Perquai ch'ina tschientina da dunnas ha gea protestà publicamain l'onn passà, suenter l'elecziun dad in um sco secretari general, ch'i dovria ussa ina dunna al timun da l'uniun tetgala. Citat original: «E nus lain che spezialmain in post vegn occupà d'ina dunna. Il pli aut e pli visibel post da la Rumantschia: il post da presidi da la Lia Rumantscha. Questa giada stoi esser ina dunna. Igl è nairas uras!»

**E**d ussa sa metta plaunsieu en moviment il carussel da can-

didatas e candidats per il post prestigius – in post cumbinà cun avunda lavur e paucas arbajas. L'emprim stausch al carussel ha dà quests dis la Surselva Romontscha. En ina brev a sias commembras e commembers menziunescha l'uniun affiliada – sper diversas fatschentas actualas – era l'elecziun dal presidi. Ella fa avertamain la dumonda per candidaturas. E la Surselva Romontscha descriva gist sezza il profil che questa persuna avess d'ademplir.

**Q**uel profil para a mai anc tut interessant da prender sut la marella, sperond che la Surselva Romontscha na prendia betg en mal questa «analisa» pauc seriusa. Damai, gizzai las ureglias!

**L**a Surselva Romontscha scriva: «Ei drova ina persuna raschuneivla, che metta las prioritads dil mund romontsch avon las finamiras persunalas e particularas.» – Vul quai dir ch'ils presidents dal passà eran pauc raschunaivels ed han gì quasi ina «hidden agenda» persunala durant lur temp d'uffizi, quasi ina «Jau-SA» (Ich-AG)? Co è

quai stà exact tar vus, preziads *Johannes Flury*, *Vincent Augustin*, *Duri Bezzola*, *Jost Falett*, *Chasper Pult* e tut la brajada masculina? Quai fiss pelvair ina tesa brisanta che quels umens avessan lavurà surtut per il profit persunal!

**T**urnain tar il «profil presidial» da la Surselva Romontscha. Quella scriva a ses commembers: «Quella persuna astga buca esser enzatgi che separa, mobein che unescha.» – Gea, quai daventa plaunsieu il mantra rumantsch: las persunas-clav en la Rumantschia ston savair unir, procurar per la pasch linguistica, ellas na dastgan betg polarisar, ellas ston tschertgar il cumpromiss, savair calmar las undas etc. Insumma, il motto sto esser da gea betg dar en egl, gea betg avair in'opiniun decisa che pudess forse provocar u clamar en vita spierts che parevan gia ditg sbandids.

**E** la Surselva Romontscha scriva per finir anc tge che vegnan ad esser las circumstanças, cun las qualas la persuna vegn ad esser confrontada: «La Romontschia ei

in construct fetg cumplex e savens grev da capir.» – Quai tuna labirintic! Mo che cun ina tala descripziun dal cosmos cumplitgà rumantsch vegni grev da persvader insatgi da candidar. I tuna plitost dad ina sfida per *Indiana Jones* u *Lara Croft*.

**P**er defender il «profil presidial» da la Surselva Romontscha: Probabel tunass la descripziun fitg sumeglianta, sch'ella vegniss or da la plima da l'Uniun dals Grischs, da l'Uniun da las Rumantschas e dals Rumantschs da la Bassa u da l'Uniun per la Litteratura Rumantscha u perfin da la Lia Rumantscha sezza. Damai datti qua in grond consens en Rumantschia. I regna pasch ed i sto restar paschaivel.

**M**o che en quella nivla tievia e ferm paschaivla va tenor mai a perder il sal e paiver – e surtut il past principal. Pertge? – Jau per mia part sun pli gugent en cumpagnia la saira cun persunas cun in'opiniun clera, cun ureglias avertas ed egl alertes per il cumbat d'ideas, persunas ch'han ina pers-

vasiun ed emprovan da ma persvader cun gust da lur atgna idea, persunas ch'han gugent la confrunziun ed il disput, persunas ch'han ideas, witz ed il curaschi d'exprimer tut quai. Per il solit vegnan talas sairadas bler bler pli lungas, sco sche la suletta finamira da la saira duai esser da mantegnair la pasch ch'è sobiso gia stabilida cun seser ensemen vi da la medema maisa. L'amur per l'armonia po esser in killer. Armonia, consens e cumpromiss pon bain esser finamiras e tenutas salidaivlas e necessarias. In program concret n'èn ellas dentant betg.

**P**erquai: Jau vulesch che enfin october sa mettan a disposiziun persunas ch'han gust e svung da la carica, persunas che vesan quant divers e divertent che quest mund rumantsch po esser, persunas ch'han silmain trais bunas ideas en tge direcziun ch'i pudess ir e che mettan era en dumonda quai ch'è vegnì fatg e cuntanschì en il passà.

**D**a quellas persunas datti. Era dunnas.